

werden. Alle arbeiter sollen zu rechter zeit uff die ecker zur arbet gehen und welcher nicht arbeten wurde ader wolle, der ßal zu gefengknus eingezogen und wegk getrieben werden. Es sollen alle tagelohner vortzeicht werden, wo sie zur herbrige inne sein, wie lange sie hie gewest, von wanne sie kommen und was ir behelf sey, wievil sie kinder haben, wo sie einander zur ehe genohmen, und welche umb den werdt uts. nicht arbethen wollen, die sollen in nach vor der stadt nicht geduldet werden. Von einem margktfuder holtz 4 §. zu hawen, von einem hedefuder uf zewe pferde 6 §., von einem hedefuder uf 4 pferde 1 gr.

Uf die ernde.

Einem schnitter, es sey man ader weyb, uf einen tag bey der speiße 18 §. Es ßal kein arbeter in der ernde, es sey man ader weyb, in die bierheuser gehen, bey des radts straffe, alleyne in feyertagen nach der predigt.

Von den hausgenossen.

Es ßal von nuhn ahn kein hausgesinde ufgenohmen werden, es stelle dan der wirth innen zuevor vorn rath, burgermeister ader richter, und das derselbige ader dieselbige einen genugßamen abschiedesbrieffs brenge und alßdann ßal es inß radts gefallen stehen. Wurde sich aber yemand understehen und hausgesinde an- ader ufnehmen, es sey man, weyb ader faulle mede ꝛ., der ßal, so offte das befunden, vormoge m. g. h. ordenung ane alle mittel gestrafft werden. Auch sollen dieselbigen hausgenossen keine kinder, es sey kneblein ader medlein uber 9 jhar alt bey sich behalten, sonder dieselben vormiethen bey des radts straffe. Auch wil der radt nach der ernde gerichte in der vorstat halten; wirt sich iemandt ane vorwissen des radts eingeflochten haben, der ßal seine straffe befinden.

Die gesellen uf den grossen hantwergen.

Es ßal kein geselle am montage ader sunsten in der woche keynen biertag machen bey straff den gesellen in yhre laden ein woche-lohn und den gerichtten 8 gr., so offte es geschiedt. Und dießer artickel ßal allen viermeistern gegeben werden; welcher sich des wegern wurde, der ader die sollen zu gefengknus eingezogen werden vormoge m. g. h. ordenung.